

दिनांक : 18.03.2026

समय : 18.45 बजे

आकाशवाणी जयपुर—अजमेर
प्रादेशिक समाचार

- मुख्यमंत्री भजनलाल शर्मा औद्योगिक विकास ऊँ जुड़्या 345 करोड़ रुपया रा खर्च वाळा 86 कामां री सरुआत कीनी अर पूरा व्ह्या काम जनता ने सूंप्या—औद्योगिक विकास सारु तीन खास नीतियां ई जारी करी ज्यी।
- केंद्रीय मंत्रिमंडल देश मांय एक सौ 'प्लग—एंड—प्ले' औद्योगिक पार्क विकसित करण री योजना मंजूर कीनी।
- राज्य मांय आज केई ठौड़ां आंधी चालण सागे बारिश व्ही।
- प्रदेश मांय काल चैती एकम् रे मौके हिन्दू नुवो साल सरु व्हेला—घट स्थापना सागे नौरता मांय पूजा—अर्चना रा खास कार्यक्रम ई काल ऊँ।

000

प्रदेश रा औद्योगिक विकास सारु मुख्यमंत्री भजनलाल शर्मा आज जयपुर मांय राख्यी ज्य्या 'उद्यमी संवाद' कार्यक्रम रे दौरान इंडस्ट्रियल पार्क प्रमोशन, एयरोस्पेस अर डिफेंस अर सेमीकंडक्टर पॉलिसी री सरुआत कीनी। राजस्थान दिवस रा सिलसिला मांय राख्यी ज्य्या ई कार्यक्रम मांय वे विकास रा 345 करोड़ रुपया रा खर्च वाळा 86 कामां री सरुआत कीनी अर पूरा व्ह्या काम जनता ने सूंप्या। कार्यक्रम मांय मुख्यमंत्री कह्यो के सरकार नीति आधारित राज मांय भरोसो राखे है। वे कह्यो के निवेशकां री राय रे मुजब भू उपयोग मांय बदलाव री मंजूरी री मियाद 60 ऊँ घटा र 30 दिन कर दीरीजी है। श्री शर्मा बतायो के लारला दो साल मांय एमएसएमई री तादाद पाँच गुणा बधी है अर रीको कानी ऊँ आवंटित प्लॉटां री तादाद मांय ई बधोतरी व्ही है। मुख्यमंत्री बिजली—पाणी ने कारखानां री बरकत री जरूरी शर्त बताता थकां ईआरसीपी अर सूरज री रोशनी ऊँ बिजली बणावण ऊँ जुडी योजनावां ने असरदार तरीका ऊँ लागू करण माथे ज़ोर दीनो। श्री शर्मा कह्यो के मौजूदा राज मांय फिलहाल गैर सरकारी हलका मांय तीन लाख नौजवानां ने नौकरियां दीरीजी है। 'राइजिंग राजस्थान' रे जरिये मिल्या 35 लाख करोड़ रुपया रा निवेश प्रस्तावां रो जिक करता थकां वे प्रवासी राजस्थानियां रा सहयोग री सराहवणा कीनी। श्री शर्मा बतायो कुछ मोटी कंपनियां राज्य मांय बिजली ऊँ चालण वाळी गाड़ियां बणावण रुचि दिखाई है।

000

केंद्रीय मंत्रिमंडल देश मांय एक सौ 'प्लग—एंड—प्ले' औद्योगिक पार्क विकसित करण री योजना ने मंजूरी दे दीनी है। मंत्रिमंडल री आज नई दिल्ली मांय व्ही मीटिंग पाछे सूचना अर प्रसारण मंत्री अश्विनी वैष्णव आ जाणकारी दीनी। वे बतायो के ई योजना रो मकसद विश्व स्तर रो औद्योगिक बुनियादी ढांचो तैयार करण सागे देश रो विनिर्माण बूतो बधावणो है। मीटिंग मांय कपास सीजन सारु सरकारी मोल ने ई मंजूरी दीरीजी। मंत्रिमंडल लघु जल विद्युत विकास योजना ने ई मंजूरी दे दीनी, ज्यीं रा तैत आवता बरसां मांय पाणी ऊँ बिजली बणावण री केई नान्ही परियोजनावां चलायी जावेला।

000

लोकसभा एक राष्ट्र, एक चुनाव ऊँ जुड़्या बिल माथे विचार कर रही समिति रा काम-काज री मियाद संसद रा मॉनसून सत्र रा आखिरी सप्ताह रा पहला दिन ताई बधा दीनी है। ई बिल मांय लोकसभा अर राज्यां री विधानसभावां रा चुनाव एके सागे करावण रो प्रस्ताव है।

000

राज्यपाल हरिभाऊ बागडे महिलावां ऊं वां री ताकत देश रा विकास रा काम मांय लगावण सारु कह्यो है। वे आज जयपुर मांय एक गैर सरकारी विश्वविद्यालय रा दीक्षांत समारोह मांय बोल रह्या हा। ई मौके विश्वविद्यालयां रा कुलाधिपति उपमुख्यमंत्री दिया कुमारी ने सामाजिक अर सामुदायिक सेवा रा हलका मांय खास योगदान सारु डी.लिट. री मानद उपाधि ऊँ नवाजा। ई मौके श्री बागडे नुवी शिक्षा नीति माथे जोर देता थकां कह्यो के आ नीति भारत रा ज्ञान री जूनी रीत ने ओजू जीवित करण रो ज़रियो है। वे टाबरियां ऊँ सकारात्मक सोच सागे हर हलका मांय अगाड़ी रेहवण बाबत् कह्यो। उपमुख्यमंत्री दिया कुमारी मान सारु आभार जताता थकां टाबरियां री भणाई-लिखाई ने देश रा विकास री बुनियाद बतायी। जळसा मांय होशियार विद्यार्थियां ने सोना रा तमगा अर उपाधियां दे र नवाजी ज्या।

000

नागर विमानन मंत्रालय किण ई उड़ान मांय कम ऊँ कम 60 फीसदी सीटां माथे बत्तो भाड़ो नी लेवण रो हुकम दीनो है ताकि सगळां ने समान रूप ऊँ सीटां मिल सके। मंत्रालय एक ही पीएनआर वाळा मुसाफिरां ने अगल-बगल री सीटां माथे एके सागे बिठावण रा बारा मांय ई निर्देश दीना। मंत्रालय पालतू जिनावरां ने ले जावण रा बारा ई साफ नीति बणावेला।

000

वंदे भारत रेलगाडियां मांय मुसाफिरां री हिफाजत सारु एंटी-क्लाइम्बिंग सुबीतो मुहैया करायो जा रह्यो है। रेल मंत्री अश्विनी वैष्णव आज लोकसभा मांय पूरक सवालां रा जवाब मांय आ जाणकारी दीनी। श्री वैष्णव बतायो के हादसा रोकण सारु वन्दे भारत गाडियां मांय देशी तकनीक कवच लगायी ज्यी है। श्री वैष्णव राज्यां ऊं रेलवे री परियोजनावां टेमसर पूरी करण सारु ज़रूरी जतन करण बाबत् ई कह्यो।

000

प्रदेश मांय आज केई ठौड़ां आंधी चाली अर हल्की बारिश व्ही। हनुमानगढ़ मांय सीळो बायरो बाजण ऊं पारो उतर्यो। बाड़मेर मांय बादळा मंड्यां पाछे सिंज्यां री पोर आंधी चाली। पाली मांय ई सिंज्यां आंधी चालण अर बादळा मंड जावण ऊं गर्मी ऊं थोड़ी साता मिली। कोटपूतली-बहरोड़ मांय ज़ोरदार बायरो बाजण सागे छांटो-छिड़को व्ह्यो। बालोतरा मांय आंधी चाली जद के चूरु मांय हल्की बारिश व्ही। सीकर, झुंझुनू, चूरु, बीकानेर अर नागौर जिलां मांय ई तेज़ बायरो बाजण सागे कठे-कठे बारिश रा समाचार है। मौसम केंद्र जयपुर रा निदेशक राधेश्याम शर्मा बतायो के आवता तीन दिन आंधी-बारिश अर कठे-कठे ओळा पड़बा रा आसार है।

000

काल चैत महीना री उजाळी एकम् ने हिन्दू कलेण्डर रे मुजब नुवो विक्रम सम्वत 2083 सरु व्हेला। काल ई चैती नौरता ई सरु व्हेला। ई सागे ई घरां अर मिन्दरां मांय घट स्थापना कर र नौ दिन ताई मां दुर्गा रा न्यारा-न्यारा रुपां री पूजा करी जावेला। काल पहला दिन मां शैलपुत्री री पूजा व्हेला अर न्यारी-न्यारी ठौड़ां मेळा भरेला। हनुमानगढ़ जिला रा मां भद्रकाली मिन्दर मांय अर पल्लू कस्बा रा मां ब्राह्मणी रा मेळा ई काल ऊं भरेला। नौरता रे मौके भरतपुर रा देवी मिन्दरां मांय खास सजावट करी ज्यी है। म्हाणा करौली खबरनवीस बतायो के जिला रा कैलादेवी मांय चाल रह्या चैती नौरता रा मेळा मांय मोटी तादाद मांय जातरु पूग रह्या है।

राज्यपाल हरिभाऊ बागडे नव संवत्सर 2083 अर चैती नौरता रे मौके जनता ने बधाई अर शुभकामनावां दीनी है। वे नव संवत्सर मांय नुवा संकल्प सागे देश अर समाज रा भला सारु काम करण बाबत् कह्यो। विधानसभा अध्यक्ष वासुदेव देवनानी ई नुवा साल री बधाई दीनी है। वां रा संदेश मांय देवनानी कह्यो के भारतीय नव संवत्सर नुवी चेतना, उर्जा अर नवोत्थान रो प्रतीक है।

नव संवत्सर रे मौके काल राजस्थान दिवस ई मणायो जावेला। ई मौके काल सिंज्यां जयपुर रा अल्बर्ट हॉल सामी सांस्कृतिक कार्यक्रम राख्यो जावेला, जिण मांय पद्म श्री ऊँ नवाजी ज्या अनवर खान मांगणियार समेत कई लोक कलाकर प्रस्तुति देवेला।

000

चूरु मांय काल चूरु महोत्सव-2026 सरु व्हेला। पंच गौरव योजना रा तैत राख्या जावण वाळा तीन दिन रा ई महोत्सव री सरुआत शोभायात्रा ऊँ व्हेला। महोत्सव रे दौरान ऊंट सजावट, साफा बांधण, रस्सा-कसी अर रंगोली री होड़ा राख्यी जावेला। सिंज्यां री पोर लोक संगीत रा कार्यक्रम व्हेला अर सूफी बैंड री प्रस्तुतियां दी जावेला।

000

सवाईमाधोपुर जिला रा खिलचीपुर गांव मांय जैविक कचरा रा निपटारा सारु नुवी इकाई सरु करी ज्यी है, जो ब्लैक सोल्जर फ्लाइ तकनीक रा आधार ऊं काम करे है। म्हाणा खबरनवीस बतायो के राज्य मांय पहली दफा काम ली जा रही ई तकनीक ऊं कम खर्च मांय तेजी ऊं जैविक कचरा रो निपटारो कर्यो जा सके है।

000